

卷之二
...

...

明治廿年季夏

井手裝

元氏長慶集卷第四十

制誥

冊文武孝德皇帝赦文

處分幽州德音

戒勵風俗德音

制誥序

制誥本於書書之誥命訓誓皆一時之約束也自非訓導職業則必指言美惡以明誅賞之意焉是以讀說命則知輔相之不易讀省征則知廢怠之可誅秦漢已來未之或改近世以科試取士文章司言者苟務剗飾不根事實升之者美溢於詞而不知所以美之之謂黜之者罪溢於紙而不知所以罪之之來而又拘以屬對踳以圓方類之於賦判者流先王之約束蓋掃地矣元和十五年余始以祠部郎中知制誥初約束不暇及後累月輒以古道干丞相丞相信然之又明年

召入禁林專掌內命上好文一日從容議及此上曰通事舍
人不知書便其宜宣贊之外無不可自是司言之臣皆得追
用古道不從中覆然而余所宣行者文不能自足其意率皆
淺近無以變例追而序之蓋所以表明天子之復古而張後
來者之趣尚耳

冊文武孝德皇帝赦文

門下昔我高祖太宗化隋爲唐奄宅區夏包舉四海全付子
孫其事何哉彼昏盈而我勞劬也明皇承之能大其業六戎
八蠻罔不貢奉由是庶尹施政庶吏弛刑視人不勤視盜不
謹燕寇勃起洞無藩籬六十有七年兵革大試其事何哉據
逸安而易萌漸也逮我聖父勤身披攘斬斷誅除天下略定
曾是幽冀賜予懷來荷賴景靈丕訓不墜環歲之內二方平
寧粵余何功時帝之力而卿大夫猥以大號加予眇身讓于

四三益甚其請皇太后始聞其事歡然慰心慈旨下臨臣
誠上迫祇受典禮懍乎予懷尚念昔者七十二君莫不升中
慶成自以爲堯舜莫已若也然而不爲堯舜之行者來代無
傳焉朕嘗推是爲心不欲名浮於實今卿大夫謂我爲文武
孝德矣其將何道以匡予予其業兢兢日慎一日慕陶堯
虞舜之行以自勉思文祖憲考之道以自勗予苟不思無忘
納誨於戲溢美之名既不克諱及物之澤又何愛焉可大赦
天下

處分幽州德音

勅昔我玄宗明皇帝得姚元崇宋璟使之鋪陳大法以和人
神而又益之以張說蘇頌嘉貞九齡之徒皆能始終彌縫不
失紀律四十年間海內滋殖風俗謹朴君臣平寧人無爭端
而卿大夫着以賊罪鞫人於聖代矣况伺察乎由是網漏吞

舟視盜不謹寇羯乘釁勃為妖氛天下持兵垂七十載朕因
眇末獲承祖宗分不得見四方無姑息之臣而九有復升平
之境矣上帝念我賚子忠賢盡獻提封恢績舊服使遼陽八
州之衆重覩開元之儀者則子侍中總之力也名藩厚位子
何愛焉劉總已極上台仍移重鎮兄弟子姪各授官榮大將
賓寮亦皆超擢管内州縣官吏肅存古等二百餘人悉是劉
總選任材能又令假攝並與正授用獎勤勞尚念幽州將士
夙著勳庸易帥之初諒宜優錫共賜錢一百萬貫以內庫及
戶部見在匹段支送充賞給幽州盧龍并瀛莫等州將士又念
八州之內九賦用殷慶澤旁流所宜霑貸其管内八州百姓
並宜給復一年仍令給事中薛存慶往彼宣慰親諭朕懷州
縣之中或有殘破偏甚者委弘靖量事便宜優卹務令存立劉
總素以清靜理人固當開釋尚恐自罹禁網亦念哀矜管内

見禁囚徒罪無輕重並宜赦免大將及判官等雖已頒官爵而
或慮闕遺宜委弘靖具名銜聞奏如有父母在者別具上聞
當加優卹朕以劉總父子頻立戰功永言將吏之中慮有沒
於王事當道從前已來官吏將士等或忠義可嘉身已淪沒者
委弘靖條錄聞奏當加追贈平時舊老始見胡塵復覩朝儀
得無悽抃遐想撫其兒稚自此免於兵鋒言念及茲用加優
給管內有高年惇獨或疾瘵不能自存者委弘靖差官就問
量給粟帛管內州縣官吏有奉職清強惠及百姓者委弘靖
具事跡奏聞當與量加進改燕趙之間古多奇士隗臺如在
代豈乏賢如有隱於山谷退在丘園行義素高名節可尚或
才兼文武卓然可獎者亦委弘靖具名薦聞於戲古人云安
不忘危魏徵對太宗以守成之不易茲朕小子抑又何知而
鎮冀克和幽燕復古慄慄夙夜不遑安寧實惟祖宗之休尚

賴股肱之力咨爾輔弼至于方嶽爾當勉於姚宋之功予亦無忘於天寶之戒宣示中外宜體朕懷

戒勵風俗德音

勅朕聞昔者卿大夫相與讓於朝士庶人相與讓於列周成王措刑不用漢文帝恥言人過真理古也朕甚慕焉中代以還爭端斯起掩抑其言則專蔽誘掖其說則侵誣自非責實循名不能彰善癉惡故孝宣必有敢告乃下光武不以單辭遠行語稱訕上之非律有慝名之禁皆所以防三至之毀重兩造之明是以爵人於朝則皆勸刑人於市則皆懼罪有歸而賞有事也末俗偷巧內荏外剛卿大夫無進思盡忠之誠多退有後言之謗士庶人無切磋琢磨之益多銷鑠浸潤之讒進則諛言諂笑以相求退則群居雜處以相議留中不出之請蓋發其陰私公論不容之詞實生於朋黨擢一官則曰

恩皆自我黜一職則日事出他門比周之跡已彰尚矜介特由徑之蹤盡露自謂貞方居省寺者不能以勤恪莅官而曰務從簡易提紀綱者不能以準繩檢下而曰密奏風聞獻章疏者更相是非備顧問者互有憎愛苟非秦鏡照膽堯羊觸邪時君聽之安可不惑叅斷一謬俗化益訛禍發齒牙言生枝葉率是道也朕甚憫焉我國家貞觀開元同符三代風俗歸厚禮讓偕行兵興已來人散久矣始欲導之以德不欲驅之以刑然而信有未孚理有未至曾無恥格益用凋剝小則綜覈之權見侵於下輩大則樞機之重旁撓於薄徒尚念因而化之亦既去其尤者而宰臣等懼其浸染未克澄清備列祖宗之書願垂戒勵之詔遂申誥教頗用殷勤各當自省厥躬與我同底于道凡百多士宜體朕懷

元氏長慶集卷第四十

元氏長慶集卷第四十一

制誥

招討鎮州制

批宰臣請上尊號第二表

批宰臣請上尊號第三表

批宰臣請上尊號第四表

批劉悟謝上表

批王播謝官表

幽州平告太廟祝文

秋分日祭百神文

招討鎮州制

門下朕嘗讀元書至於佳兵者是樂殺人因念自孩名之
逮于羈州十三年不能為成人豈忍一朝之忿驅而殺之然
而田弘正首以六州之眾歸於朝廷開先帝之雄圖變河朔
之舊俗除去苛暴昭宣惠和愛人如身養士如子拊循教訓
必以忠孝為先是以魏之師徒一年而知恩二年而知禮三

年而知相與讓於道矣故南征淮蔡東伐青齊北定趙地元
勲茂績皆自魏師肆我憲宗付之心膂入則輔弼出則藩宣
推誠不疑近實無比顧朕小子獲受丕圖嗣守不遑何暇恢
復而承元請覲冀部擇才苟非勲賢不敢輕授是用咨我元
老臨於是邦而又寵諸將以懋官加三軍以厚賞復其租入
惠彼蒸黎於此一方之人可謂無有不至而梟音未革狼顧
猶存忍害忠良恣為殘賊臨軒震悼撫几驚嗟天平不仁一
至於此朕下為君父上奉祖宗肆舟楫於鯨鯢啗股肱於蛇
豕尚欲因循忍恥僂俛偷安非唯傷心於田氏之子孫亦將
何顏謁先帝之陵廟人神共憤卿士叶謀咸願誅夷用申冤
痛便合興師進討以翦奸凶尚念一軍之中豈無義勇倉卒
變動必非衆謀苟得罪人其餘何過宜令魏博橫海昭義河
東義武等軍各出全軍以臨界首仍各飛書檄具諭朝旨如

王廷湊能執首謀為亂扇動三軍者送付隣道或就鎮州處
置然後束身歸朝必當超獎三品正真官并與實封二百戶
其餘三軍將士一切不問其中大將等或有能相勸諭翻然改圖
者各隨事跡當加寵擢如王廷湊遂迷不寤諸道宜便進軍
以時翦滅苟不得已至於用師其有效忠則宜懸賞如有能
斬凶渠者先是六品已下官宜與三品正真官先是五品已
上官節級升進仍與實封三百戶莊宅各一區錢二萬貫以
一州歸順者便與當州刺史仍賜實封二百戶如先是刺史
以州歸順者超三資與官仍賜實封二百戶以一縣歸順者
超兩資與官賜實封一百戶如有能率所管兵馬及以城鎮
來降者並超三資與官仍賜實封一百戶錢一萬貫以身降
者亦與轉改仍賜錢帛應赴行營將士如有能梟斬凶渠者
亦准前例處分其有城鎮將士百姓等守節拒賊身死王事

者各委長吏優給其家仍具事跡聞奏當加褒贈其有潛謀
誅斬渠魁被其屠戮者宜優加追贈并賜錢帛仍與一子官
諸軍所至不得妄加殺戮及焚燒廬舍掠奪資產并有拘執以
為俘馘其管內州縣有能自置義營堡柵王師所至能相率來
歸各加酬獎時當秋候務切農功邊界之人懼廢耕織應緣
軍務所須並不得干擾百姓如要車牛夫役及工匠之類並
宜和雇情願仍優給價錢賊平之後應立功將士並與超資
改官節級賜物其長行官吏歸降者亦當優厚褒賞幽陵變
擾誠謂亂常以其旁及賓寮有異上加台鉉校其輕重示以
招携尚開迷復之門用廣自新之路昔者堯舜之俗比屋可
封虞芮之人讓畔可感仁義則水火可蹈忠信則蠻貊可行
由是言之亦在化之而已逮我長理何其遠哉豈朕之滿假
荒寧自聖而不可教耶將朝之魁梧骨鯁自持而莫我念也

二者之來皆朕不敏內省終夕其心洗然於戲封域之中干
戈作矣廊廟罇俎無忘弭寧布告朕懷以頌良畫主者施行

批宰臣請上尊號第二表

朕聞天職生植聖職教化天職舉則四時行聖職修則萬方
理然而天不以行四時而為德故蕩蕩無名聖不以理萬方
而為功故謙謙不宰顧朕小子獲承丕圖上賴祖宗之靈下
託股肱之力先定鎮冀次來幽燕皆吾日月之所照臨車書
之所轍跡失之則有以自愧得之則何足自多况今四海雖
清物力方困六戎雖伏邊備尚勞百吏雖存官業多曠萬目
雖設紀律未張有此四者不遑荒寧思與卿士夙夜俾乂卿
宜為我提振大法修明政經懾竄戎夷阜康黎庶四者既理
名焉用之朕方以臯夔之務委卿卿宜以堯舜之事教我驟
加徽號深恥近名循省表章難遂來諫

批宰臣請上尊號第三表

昔齊相議封禪管仲驟諫其未宜晉武平江東何曾深惟於遠馭彼二臣者居安思危之志明而有犯無隱之誠切也况朕寡德謬應昌期賴先帝削平之威蒙列聖寤漬之澤聿來燕冀甫靖華夷既無德而有成實以祥而為懼卿等所宜朝夕納誨警予荒寧雖休勿休日慎一日而乃過為溢美頻上鴻名諒多忠赤之誠殊非藥石之愛汝為予殲為朕揣摩汝為予舟為朕康濟強我懿號不若使我為有道之君加我虛尊不若使我居無過之地宜罷來請用副迺懷

批宰臣請上尊號第四表

朕以月正元日祇見于九廟對越于上玄千官在前萬乘居後覩聲明文物之盛望城社宮闕之尊尚念高祖太宗艱難於經營德宗憲考躬憂於績復懼不克荷以羞前人夙畏嚴

恭式冀無過而燕趙底定戎獯和寧實惟列聖之休焉敢自大其意左右輔弼庶尹師長猥以鴻名願加薄德三詔執事抑而不行物議愈堅予衷未信四陳章表備列古今且曰告虔之時寧忘繼志問安之下胡不慰心有竊於顯榮難從於封執於戲允恭克讓既見奪於群情克己為仁庶自勤於三省勉依來請深用媿懷

批劉悟謝上表

朕聞上黨亦天下之勁兵昔者李抱真用之一舉破朱滔再舉感田悅訓養十萬威聲廓然人到于今號為良將夫以卿之勇義才略猶將遠慕韓彭區區抱真夫豈難繼况以克融廷湊之狂脆小賤比朱滔田悅之熾大結連是猶以孩嬰而校責育也蜂蟻相聚其能久乎卿宜密運謀猷明宣號令避強擊惰取暴撫羸勿爭虵豕之鋒宜得鯨鯢之首再圖麟閣

永煥縑緗無為他人所先當使功居第一策勲在近勿復為勞所謝知

批王播謝官表

朕聞有衆不言弱有地不言貧是以管夷吾用區區之齊而諸侯九合今朕四海之大億兆之衆獨不能擒廷湊克融而曰物力先困朕甚惑焉况高祖太宗之法今具存德宗憲考之舊章猶在制誥比下選拔日聞較量重輕勤卹仁隱而室閭益耗縣道益貧職業壞墮程品差戾議論講貫殊無古風豈朕聽之不聰而股肱耳目莫得宜其効也先皇帝以卿有廊廟之畫倚以為相眇朕小子得而用之卿宜勉竭誠懷副茲嘉屬無為齷齪以傷先帝之明所謝知

幽州平告太廟祝文

維長慶元年歲次辛丑五月景申朔十四日己酉孝曾孫嗣

皇帝臣諱敢昭告于太祖景皇帝天革隋暴付唐養理高祖太宗奉順天紀玄宗平寧六合同軌物盛而微墉崇則毀網漏鯨鯢隙開螻蟻幽燕狼顧齊趙虎視割據封壤傳序孫子不貢不覲自卒自始聖父披攘靈駭波委擒滅斬除如運支指冀方獨迷再伐再已碣石是徵承詔唯唯逮臣寡昧虔奉先旨洞開誠明滌濯痕恥承元雲奔總亦風靡悉率賦輿盡獻州里不命一將不戮一士不費一金不亡一矢五紀逆命一朝如砥實天垂休實聖垂祉敢薦成功以永千祀尚饗順

宗室

改云孝孫
嗣皇帝

憲宗一室

改為孝子
嗣皇帝

餘並同

秋分日祭百神文

維長慶元年歲次辛丑八月甲子朔十八日辛巳皇帝遣通議大夫行內侍省常侍賜紫金魚袋李其祭于百神之靈朕奄宅萬有亭毒品類日月所照永思和寧上極于天下蟠于

地包山絕海窮冥入玄至于毛鱗裸羽之神咸秩無文以祛
不若秋序始肅時將順成且報且祈用舉常祀罔害嘉穀以
貽神羞

元氏長慶集卷第四十一

元氏長慶集卷第四十二

制誥

授王播中書侍郎平章事兼鹽鐵使制

加裴度幽鎮兩道招撫使制

加裴度鎮州四面招討使制

授劉總守司徒兼侍中天平軍節度使制

許劉總出家制
加烏重胤檢校司徒制

授王播中書侍郎平章事兼鹽鐵使制

門下昔蕭何用新造之漢而能調發子弟完補敗亡使關東
糧饋不絕者以其盡得秦之圖籍而周知其衆寡也我國家
乘十一聖之區寓提億兆人之生齒而曰不能足食足兵朕
甚憐焉得非調陰陽撫夷夏者不欲侵貨泉之任而主會計
校盈虛者不得參邦國之重乎予將兼之允在能者諸道鹽

元集四十二
鐵轉運等使太中大夫守刑部尚書王播在德宗時以對詔
入仕踐更臺閣由御史中丞大京兆尹掌縣官鹽鐵爲春官
尚書乃長巴鬣以控蠻蜚盡稱厥職達于予聞洎詔徵還便
殿與語得所未得聞所未聞昭然發矇幾至前席重委操劔
鎡刃益精國有羨財而人不加賦東師在野物力蕭然不有
主張孰能戡濟是用命爾作相仍以舊務因之爾其西備戎
羗東定燕冀內實九府外豐萬人百度群倫罔不在爾於戲
典謨訓誥行之具存邪正是非知之孔易予唯以不敏不明
茲故用爾爲股肱耳目又安能一二戒誨垂之空言爾其
自勵于爾心無令觀聽者論爾於鄉校可依前件

加裴度幽鎮兩道招撫使制

門下夫以區區秦伯而猶念晉國曰其君是惡其人何罪况
朕均養億兆爲之君親燕人冀人皆吾乳哺而育之安忍

以豺狼驅脅之故絕其飛走盡致網羅止行犯命之誅是用
開其一面河東節度觀察處置等使金紫光祿大夫守司空
兼門下侍郎同中書門下平章事太原尹北都留守上柱國
晉國公食邑三千戶裴度昔者區域之中蜂蟻巢聚蔡有逆
孽齊有狡童厥初圖征疑議滿野不懼不惑挺然披攘苟無
司南允罔能濟佑我憲考爲唐神宗實惟股肱運用忠力肆
朕小子蒙受景靈冀服於前燕平於後而撫御失理盤牙復
生求思弭寧中夜有得國有元老夫何患焉用是亟宣懇惻
之誠就加招撫之命於戲頃者師道元濟乘累代襲授之資
藉山東結連之勢以丞相布畫於千里之外使諸將持重於
四封之中而猶劉悟裂虵豕之軀李祐潰鯨鯢之腹蓋逆順
之情異而忠孝之道明也况幽鎮無名暴狂以丞相進觀其
宜以諸將齊奮其力斧鑕之刑坐迫椒蘭之氣外薰誰不自

愛其生焉能與亂同死度宜開懷緩帶以待其歸可依前守
司空兼門下侍郎同中書門下平章事河東節度使充幽鎮
兩道招撫使餘如故

加裴度鎮州四面招討使制

門下傳云死者不復生刑者不復屬是以先王斬一支指殺
一犬彘莫不伏念隱悼至于旬時決而行者蓋不得已也予
於鎮人亦然伏念俟其峻革詎止旬時前命相臣招懷撫諭
矜其誑誤示以生門期於盡脫網羅豈欲驅之陷穿而豺狼
當道荆棘牽衣雖欲歸之於仁厥路無由而至况王師墜境
義勇爭先朕每抑其鋒鏑未忍覆其巢穴是猶愛稂莠而傷
稼穡養癰疽以潰肌膚獨懷兒女之仁慮失祖宗之典今上
台居鎮筭畫無遺操晉陽之利兵驅屈產之良馬舉河東義
成之衆合滄景澤潞之師當元翼授命之初乘田布雪寃之

忿舉毛拾芥其易可知兼用恩威尚存招致宜令河東節度
使裴度充鎮州四面招討使於戲以一城之卒敵天下之師
徇猖蹶之徒抗君父之命吾哀爾輩死實無名苟能自新亦
冀容汝主者施行

授劉總守司徒兼侍中天平軍節度使制

門下百谷所以朝巨海海不疑其貳於我也五嶽所以鎮厚
地地不畏其軋於已也故山澤之氣上騰天應之則爲雲爲
雨台輔之精下降君得之則稱帝稱皇是以採群疑者終不
能成大功推至信者必有以來大順况朕志先定臣誠素通
偃七十年之干戈垂千萬代之竹帛非我獨斷安能遽行某
官某生知禮樂神授機符移孝資忠本仁祖義學弄之始畫
地而壁壘勢成言兵之時聚米而山川形具象賢秉哲脫俗
遺榮慕清淨以爲宗會富貴之來逼自居劇鎮亟立殊勲威

定兩藩化行八郡日者除凶准甸易帥常山張吾掎角之雄
賴爾股肱之力加以深衷早達密款屢聞求奉浮圖之真願
弃全燕之重誠嘉素尚難遂過中縱妻子之可捐豈君父之
能捨朕惟鄒魯之地鄆實居多俗尚師儒人推補厚施之美
化豈無衆善之因革其非心寧失大雄之旨是用正名台座
重委藩方爾其張我四維敷我五教握龍節以率下露蟬冕
以行春宜體夔龍之令圖勿徇巢由之獨行可守司徒兼侍
中使持節鄆州諸軍事守鄆州刺史充天平軍節度鄆曹濮
等州觀察處置等使散官勳封如故主者施行

許劉總出家制

門下朕聞西方有金仙子自著書云昔我於無量劫中捨國城
妻子以求法要朕嘗聞其語未見其人安知股肱之間目驗
茲事脫身羈網誠樂所從捨我繫維能無永歎遂其高尚良

用憮然具官劉總五嶽孕靈三台降瑞位兼將相代襲勳庸
視軒冕若浮雲弃妻孥猶脫屣屢陳章表懇願捨家勉喻再
三終然不奪朕又移之重鎮寵以上公莫顧中人之情遂超
開士之跡於戲張良却粒尚想高縱范蠡登舟空瞻遺象功
留鼎鼎誓著山河長存魚水之歡勿忘香火之願宜賜法號
大覺仍賜僧臘五十夏主者施行


加烏重脣檢校司徒制

門下古之命將莫不登諸齋壇告於郊廟分其闡限推其車
轂非所以寵異崇大而姑息之蓋先王之懋典授之專柄然
後遷延者必罪選懦者必懲式所以使恩威並流而人人無
辭於賞罰也橫海軍節度滄德棣等州觀察處置等使銀青
光祿大夫檢校司空使持節滄州諸軍事兼滄州刺史御史
大夫上柱國邠國公食邑三千戶烏重脣嘗以懷汝之師南

元集四十二
伐叛蔡博大持重不要奇勝不用鈇鉞不嚴刁斗舉必示
信戰必尅期寇讎知其仁士卒懷其惠梟鏡就執第其勲庸
雖坐樹不言而圖功甚大先皇帝分命水土換其旌旄俾廉
於滄以長橫海幽鎮既亂人心或搖師衆無譁而湯池自固
者重脩蓋有之矣而又明於斥候善揣敵情動靜以聞茲實賴
汝是用升其秩序以大威聲進位上公式戎律此所以慰
薦爾之忠力也爾其勉之於戲甘之誓曰用命賞于祖不用
命戮于社朕奉祖宗而守社稷也其能私賞罰於天下乎賞
既不俟於成功罰固難期於後効矣若驚之寵無忘戒之可
檢校司徒依前充橫海軍節度使

元氏長慶集卷第四十二

靜嘉堂文庫所藏



靜嘉堂文庫所藏